

Date : 25 Mei 2014
Title : Yayasan TNB peruntuk RM1b taja 11,000 pelajar
Publication : Mingguan Malaysia
Page : 7

Yayasan TNB peruntuk RM1b taja 11,000 pelajar

BANGI 24 Mei - Yayasan Tenaga Nasional (YTN) telah membelanjakan lebih RM1 bilion untuk menaja 11,000 pelajar sejak ditubuhkan 20 tahun lalu.

Pengarahnya, Azman Zakaria berkata, bermula tahun lalu jumlah peruntukan tersebut ditingkatkan daripada RM55 juta kepada RM65 juta setahun.

Menurutnya, kenaikan itu selari dengan hasrat Perdana Menteri, Datuk Seri Najib Tun Razak yang prihatin terhadap pembangunan pendidikan negara.

"Peruntukan tersebut melibatkan dua kategori pembiayaan iaitu biasiswa penuh dan pinjaman boleh ubah.

"Setiap tahun YTN menawarkan biasiswa penuh kepada 205 pelajar bagi melanjutkan pelajaran di luar negara, Universiti Tenaga Nasional (Uniten) dan institusi pengajian tinggi awam (IPTA) lain," katanya

kepada pemberita selepas perasmian Konvensyen Bakal Ketua Pengawas Sekolah Berasrama Penuh (SBP) di RHR Hotel Uniten di sini, semalam.

Terdahulu, konvensyen itu dirasmikan oleh Ketua Pegawai Korporat Tenaga Nasional Berhad (TNB), Datuk Roslan Ab. Rahman.

Konvensyen yang bermula semalam hingga esok melibatkan 138 pelajar tingkatan empat daripada 68 buah sekolah SBP di seluruh negara.

Mengulas lanjut, Azman berkata, objektif konvensyen itu adalah untuk membentuk ciri-ciri kepimpinan kepada pelajar yang bakal menjadi pemimpin masa depan negara.

"Hasrat kami di TNB ialah agar program ini dapat membentuk pemimpin masa depan negara dengan memberi pencerahan mengenai haluan kerjaya terutamanya berdasarkan nilai korporat TNB," katanya.



ROSLAN Ab. Rahman (tiga dari kiri) dan Azman Zakaria (kiri) beramah mesra dengan sebahagian daripada pelajar tingkatan empat selepas majlis perasmian konvensyen bagi bakal Ketua Pengawas SBP di Uniten, Bangi, semalam.